

st. Dr.


59495

III

Philosophia. 846

Porecki Tom,

Rajcki Constantini Casimiri Triasmius expositi-
cus analogomatum ex universa Philosophia.







TRIASMVS
EPICRITICVS,
ANALEGOMATVM,

EX VNIVERSA PHILOSOPHIA,
AD MENTEM D. THOMÆ, DOCTORIS ANGELICI,
CONFORMATVS.

ET
ILLVSTRISSIMO DOMINO,
D. JAN VSSIO
SKVMINTYSKIEWICZ
PALATINO VIL-
NENSI,
BRACLAVIENSI, IVRBORGENSEI,
NOVOVOLENSI, &c. &c.
CAPITANEO.

A
CONSTANTINO CASIMIRO RAIECKI,
*Juris, & Philosophiæ Auditore, oblat. Ac in peraugusto Academia Crac:
D. Jagiellonis Lycæo publicè ad disputandum propositus.*

PRÆSIDENTE V. M. IOACHIMO SPERONOWIC,
Coll: Maiore, Can: S. ANNÆ, Cursus eiusdem,
WLADISLAVIANI Professore.

Anno à partu Virginis 1641. Mense Augusto
Die Hora pomeridiana.

CRACOVIAE,
In Officina Typographica STANISLAI BERTVTOVIC.



EPIGRAMMATA
IN STEMMA DOMVS
TYSZKIEVICIANÆ.

Ardua; ad æthereos protendit Luna penates,
Cornua : pro meritis præmia ferre cupit.
Stella super mediam consistens: lumine terris
Dum adstamus propius gratificemur ait.
Sidera sunt astris, sequitur sua Cynthia Phæbum
Prosimus Patriæ dum pia fata iubent.

59495
111

A L I V D.

Aurea cœlestis circumspice cornua Lunæ,
Et faciem stellæ, lumine conspicuam.
Non; TYSZKIEVICII genij, moritura trophæa
Collige, qui nomen, rem generisq; notas;
Ignibus æternis, cælorum tecta coruscant,
Et TYSZKIEVICII laudibus, ampla Domus.

A L I V D.

O Luna TYSZKIEVICIÆ felix domus,
O Stella, mundo Lechico pulcherrimè,
Sæclo perenni, vestra lux effulgeat.



Ad Illustrissimum Dominum, Dominum
IANVSSIVM SKVMIN TYSKIEWICZ,
MÆCENATEM AMPLISSIMVM.

CONTEMPLATRICIS Philosophiæ, oracula quadam selectiora, Illustrissima Celsitudini Vestre, animo oblata paratissimo, & voluntate ad obsequendum deditissima, exopto esse quàm gratissima & acceptissima. Esto namq; non grauatim concedam, maius non esse, haustu frigida, aut pomi conspectu nobilioris, istud donarioli precium; sentio tamen magnum esse, quicquid à magnis gratificandi causis deriuatur. Quod si ea quæ iura sanctioris dictant gratitudinis, mole sua, ac non natura sunt humilia, profecto eiusdem monitricis consilium me complexum esse fateor, ut si tantò gratior esse vellem, Te meum patronum, ac protectorem, exteriori isto pietatis interna documento venerarer. Imperio pietatis, si quis quod præstare potest faciat, errori nihilominus factum suum sit futurum obnoxium, non excuso: dum modò publicè planum faciam, à me conquiri modos omnes, quibus ampliozem in me Illustriss. Cel. Vestre amorem prouocarem. Virtus hac, in animis iuuenum, nunquàm vigore suo fuit destituta erga patronos, quorum amore postquam semel in flammaverat animum, omnia illi magna, causâ eorum quos veneratione obsequentiissima colerent, potuit imperare. Fabricam structuræ quam offero paruitate sua exiguam esse non diffiteor, at quod fragrantem velut rosarum Sancti Doctoris spiret doctrinam; quod eam in angusto Academia Cracouiensis, alias artes optimas pertractando, biennij cursu, collegerim, plantario; quod à tali animo qualis est meus, ad promerendum ampliùs fauorem Illustrissimæ Celsitudinis Vestre proficiscitur; hinc iam quisq; se ipsa maiorem esse, quisquis recto pollet animi iudicio fatebitur. D. Thomas Doctor est Angelicus, cuius hic doctrina ex antesignano Philosophorum Aristotele saluberrimè delibata proponitur. Academia Cracouiensis, virtutum, & literarum,atrix est in regno generalis, tot viros, tanta complexa eruditionis, laboris, & honoris, ut firmamenti sydera maioris & minoris magnitudinis amuletur. De meo animo illud dicam modestissime, quo primum die computari se in numerum Clientum Illustrissimæ Cel. Vestre intellexit, illicò inflammatus ad continuò & deuotissime inserviendum, illud sollicitè menti cepit inculcare, omne tempus circumspiceret, quo, quibus posset rationibus, luculentissimum suorum Votorum ac desideriorum, ut potè publicum, daret, documentum. Moderno tamen tempus propius, debitor ille moræ impatiens, non aduertit, quo ad persoluendum quod debebat, auspiciò ingrederetur. At neq; serò fortasse compareret exolutor, qui debitum integerrimum recognoscit, etiamsi centies & ampliùs persoluerit. Quid quod res ipsa, operâ bienalis assiduitatis, maturius comprehendere non potuit, & comparata, non multum diu, gratiosi protectoris quarendum erat patrociniū, persistente in animo, perenni Illustrissimæ Cel. Vestre tot amplissimorum beneficiorum iucundissima memoria. Quæ si tam clara, tamq; luculenta in me nunquàm extisissent, splendor tamen patrius, Virtutum tot clarissimarum Illustrissimæ Cel. Tux diffusus in

fufis in omnes partes radiorum luminibus, animum etiam peregrinum, ne dicam domesticum, in sui non tantum admirationem, sed etiam predicationem, potuit rapere, non solum inuitare. Et tamen nunc illud ego consulto non faciam, ut vel Natalium Illustrissima Cel. Vestra predicationi, diutius insistam, aut singulas etatum progressiones, exaggerando ad applausum faciam admirandas. Neque enim mentem Illustrissima Cel. Vestra, hoc affectare mecum constituo, quem sine multa verborum profusione, omnes qui vim laudis vera norunt laudatissimum esse non verbis sed animis consentientibus attestantur: neque ego me in eorum catu repono, qui aequè ut par esset vocalem vitæ panegyrim Illustrissima Cel. Vestra queam in publicum producere singula quam brevissime attingisse suffecerit, & illud in primis, Illustrissimam Cel. Vestram, diuina benignitate, sanguine atque satum, Illustrissimi parentis THEODORI SKVMIN TYSZIEVICII PALATINI NOVOGROD: Viri omnium annalium voce, omnis aui memoria, propter virtutum splendorem, & rerum gestarum magnitudinem, longè dignissimi, esse oriundum. THEODORVM nomino, Parentem Tuum Illustrissime Domine, Ciuem diuino planè munere atque clementia, visibus patriæ deditum; maiorum suorum gloriæ promotorem & assertorem fortissimum, feruentissimum: Tuarum heróicarum pro Deo & patriâ aggressionum, exemplar ad viuum expressum, ac verè vnicum, quia tanti genitoris, patrijs pro patriâ lineamentis meritorum, pulcherrimè circumductum. Magnum est atque Illustrè naturâ sua diuini genus beneficij, magnis proditum esse generis ac sanguinis natalibus, longè tamen illustrius ac multò est ampliùs, maiorum magnitudinis, emulatrice Virtute, succrescere, amplificari, conseruari. Peculiari genere pietatis obstringuntur, clarioris cuiusque prosapiæ successores; ut quo ampliores nati sunt, splendore virtutis, atque dignitatis prodromos & maiores; tandè ipsi incumbant solidius, ad omne decus & iter vitæ præclarioris, quod dum viuunt pergant decurrere sublimius & auspicius. Fecit hoc cumulatissimè Illustrissimus parens Tuus, gloriæ domus TYSZKIEVICIANÆ propagator acerrimus, fecisti Tu Illustrissime Domine; facis, atque vtinam quam diutissimè bono patriæ superstes facias; cum maiorum tum parentis Tui imitator & amplificator virtutum, quâ bello, quâ pace, felicissimus, aequissimus. Cui namque excidit THEODORVM TYSZKIEVICIUM, duobus potentissimis Regibus, & fortissimis patrij Regni propugnatoribus, STEPHANO atque SIGISMUNDO, III. pro multis & grauib; in Remp. promeritis longè omnium carissimum, & honorum accessione dignissimum extitisse? Querebatur STEPHANO Regnante, orator cultus & circumspèctus, ad Moschum ipsa celi asperitate inciuilem principem. Iuit THEODORVS TYSZKIEVICIUS ad tanta Regni & magni Ducatus Lithuania obsequia; vel vitæ discrimine cumulanda paratissimus; iuit magnanimus, vultum ferocem Tyranni impotentis, imperterritus conspècturus; insanam gentis barbaricæ perfidiam, si necessitas eo vocaret, aequo animo laturus, priuatam vnius vitam & salutem communem patriæ, non pari, quod fas est bonum Ciuem præstare, pensans æquilibrio. Verum Deo fauente qua incolumitate abiit, eadem redijt. Ac tametsi rudi & barbaro auditori disertus Orator concordiam persuadere non potuit; instructa tamen iussu Regis acie, pacem confuso Dynasta suasit, & inuito persuasit. Sed prolixum est nec istius aut paginæ, aut temporis, in lucem promerita eius vocare vniuersa. SIGISMUNDO Monarchæ, Regum Maximo & sapientissimo, quam bonus, fidelis, gratiosus, quam Ciuis patriæ commodus, videretur; accessio honoris

Palatinatus

Palatinatus Nouogrodensis, qua ab illo Rege sanctissimo publicè ornatus extiterat, planum
 fecit. Enimverò sunt ista, aliq, quàm plurima, & clarissima Illustrissimi parentis.
 Tui in Rempub. sua virtutis, laborum, fidei, testimonia: qua Cives optimi, iucunda &
 recenti memoria, fouent & complectuntur. Ingeminari in luce Regni publica, & per
 ora virorum clarissimorum. verissimè circumferri audimus, & letamur; THEODO-
 RUM SKVMIN TYSKIEVICIUM, IANVSSII parentem, legationem ad
 Moschum, STEPHANI Regis nomine, vt fas erat illum virum obuiisse; bello contra
 Tyrannum iussu Regis suscepto præfuisse, in euentu belli, qui plerumq, est dubius & for-
 midolosus dimicatione & virtute bellica superiorem extitisse; Polociam cepisse, in
 Liuania rebus componendis, operam industria plenam nauasse, à SIGISMUNDO
 pro tantis in patriâ & Reges officijs & periculis, Palatinatu Nouogrodensi cumulatam ex-
 titisse. Nimirum prædicta omnia Illustrissime Domine ita parentis Tui propria, exti-
 terant; vt in Te magna pars illius gloriæ cōmuni omnium iudicio deriuetur. Tanto magis quod
 si res à Te ipso gesta eis comparentur, simillimus parenti natus, non tantum sanguine, sed
 factorum illustri gloriâ reputeris. Tua sunt quæ Tui genitoris, vicissimq, illius quæ Tua
 sunt. Ita hæc sunt vtriusq, Vestrum communia; vt singulorum sint quædam separata,
 & peculiaria. Nam quicquid in patria, pro patria, indefessis Tuis collectum est vir-
 tutibus, pro quibus conquirendis, infractos animi labores, exhaurire nunquam dubitasti;
 Tuum esse proprium quis negabit? Negare si tantum est impudens audeat vel ipsa in-
 iudicia, quid quantumue fidei, laboris, impensarum, officiorum, SIGISMUNDO III.
 bellatori olim felicissimo, in illa diuturna satis & periculosa; attamen Regi, Ciui-
 bus, Regnoq, toti, gloriosa obsidione impertisti, præstitisti. Nam cum lacertis Tuis alio-
 qui tunc vegetis, & ad sustinendos impetus hostiles paratissimis, magna pars militia
 Magni Ducatus Lithuania, contra hostem dirigenda incubuisset, virum Te præbuiisti
 bellatorem. Ibi tum magnanimos maiorum Tuorum ausus, imitator gloriæ illorum e-
 ximius confirmasti, sollicitus de vindicandis iniurijs, & hoste domando, qui nihil aliud
 spiraret, nihil moliretur, quàm cadem bonorum, atq, imminutionem cum latifundijs vi-
 cini Regni libertatis. At quando ipsum seruire fuerat commodius, qui vel quod natu-
 ra extet seruus, eo quod sit barbarus; quibus imperare alios æquum esse non nemo ad-
 monuit: vel quod cupiditate barbarica inflammatus, aliena invadendo diriperet;
 solo aquaret; vel quod gentem barbaram sola crudelitate coerceseruitutis: libertas
 autem Regni nostri ferre nunquam eos didicerit, qui vlla sauitiâ, vexare illam ag-
 grediantur. Hæc cum animus Tuus secum accuratiùs omnia ponderaret, Achillea quasi
 virtute belligerandi exarsit, & quantum virtute militari valeret: probauit, quidq,
 stragis, in hoste profligando facere posset, non verbis, sed re, factisq, erudiuit. Nimi-
 rum Regi tunc SIGISMUNDO, presenti Smolensci oppugnatori, virtutem, &
 industriam Tuam bellicam probatam esse voluisti, & Cives fortissimos, alios vitam cum
 sanguine profundentes, alios ad profundendum eandem pro patriâ paratissimos, viuis e-
 xemplis, & periculis, ex quibus diuino eripiebaris auxilio, animasti. Quid multis in
 campo Hector aut Achilles; in dandis hosti subingato conditionibus, Vlises, aut Ne-
 stor, vnâ cum viris & Ciuibus patriæ clarissimis, extitisti. Quis ergo Te, tot erga
 patriam cumulatam promeritis, limis oculis intueri potuit; primò quidem Mscislauiem-
 sem dein-



sem, deinde Trocensem Palatinum? quis nunc nisi rerum à Te gestarum ignarus miratur, quis non potius bonorum latatur, & gratulatur, assignatum esse debitum virtuti premium; cum Palatinus Vilnensis, quod Tibi cupimus longissimum, & fortunatissimum, diuino beneficio & Serenissimi Domini VLADISLAI IV. Regis ac Domini nostri clementissimi, & inuictissimi Regia beneficentia, haberis & diceris. Ad eius Regis ac Monarchæ gloriosissimi obsequia, & commoda Patrie ampliora præstanda, ut mandato Imperatoris Dei Opt: Max. Illustrissima Cel. Vestra vita diutissime ac felicissime perfruatur Cliens intimus exopto.

CONSTANTINVS CASIMIRVS RAIECKI.

TRIA-

TRIASMVS.

MONAS EIVS PRIMA,

PHILOSOPHIA IN COMMVNI.

1. **P**HILOSOPHIA, diuinarum & humanarum rerum cognitio, in communi, per speculatiuum, & practicum; ac speculatiuum, iuxta gradus abstractionis, in habitus reales diuersos specie distribuitur.

2. Finis speculatiuæ, est veri contemplatio, in qua, hominis beatitudo formaliter consistit.

3. Hinc sequitur aliud esse Philosophari seriò, aliud veritati imponentē agere sophistam; docet ille, hic decipit; ille quo ad res patitur erudit demonstrando; hic irridet deludendo, ille veras contradictiones manifestat; iste apparentes obtrudit: quid multis? quantum iste tortuosis valet incautos implicare mæandris; tantum ille, ope Logicæ, vt filo Ariadnes adiutus, animis deceptorum, in libertatem veri iudicij, incumbit vindicandis.

DE LOGICA IN COMMVNI.

4. Logica, progressum genuinū in scientijs facere volentibus; in addiscendo cæteris præmittenda est; vt potè simpliciter ad illas necessaria, ne oscitantes moniti neglectores, infami allidantur scopulo, quo cautiores vetantur, simul scientiam, & modum sciendi quæritare.

5. Omnia vero consonant, quæ de genere Logicæ dicuntur; est illa facultas, in vtramq; partem differendi; est ars speculatiua, est modus & instrumentum sciendi; est insuper vera scientia, non practica, sed speculatiua, actuum rationis per secundas intentiones directiua. Obiectum ei differentiam ab alijs tribuens, est Ens rationis, realium ordinabile. Docens, & vtens, ita illam dispertiunt; quod vnum realem habitum constituent. Pro fine cognitionem obiecti, ac passionum suarum habet; quo, ad perfectè cognoscendum scientias ducimur.

ENS RATIONIS.

6. Ens naturæ, verum esse in rebus habet. Ens rationis est à solo effectore intellectu cognoscibile; duratq; quamdiu illi obijcitur. In communi sumptum, in priuationes, negationes, quæ per species habituum oppositorum cognoscuntur; & tandem in relationes rationis, diuiditur. Sub his cadunt Entia Logica, secundarum notionum, per reflexam, eamq; comparatiuā cognitionē apta generari.

7. Esse visum, cognitum, intentio secunda formalis, non sunt Entia rationis; esto sunt obiectiuæ notiones, quæ per excellentiam, relationes rationis nominantur. Ex quo fundantur supra rem vt cognitam, passio earum est, esse veritatis ostensiuas. In concreto sumptæ. Prædicantur de formis abstractis accidentium, non item de formis substantialibus in abstracto.

VNIVERSALIA IN COMMUNI.

8. Dari à parte rei, & in essendo, naturas vniuersales, absque singularitate ab intellectu attingibiles; quibus abstractis aduenit vniuersalitas, & aliæ.

9. Vniuersale est vnum, aptum esse in multis: in quo nulla vnitas formalis positiua, numerali minor reperitur; sed saltem conuenientia & conformitas, naturæ vnus cum alia, quo ad prædicata essentialia, quæ per intellectum præcisa habent & vnitatem, & ad essendum aptitudinem positiuam.

VNIVERSALIA IN SPECIE.

10. Singulorum definitiones, & diuisiones, rectè à Porphyrio traditæ. Genus de pluribus specie, species de differentibus numero, cum differentiâ prædicantur. Proprium, per ordinem ad inferiora speciei: accidens per respectum ad subiecta; in esse prædicabilium cōstituuntur. Nec genus, nec species, formaliter in vno inferiorum possunt conseruari. Indiuiduum determinatum, de vno singulari dicitur; vagum, dicit naturam cum modo essendi particulariter qui communis est.

ANTEPRÆDICAMENTA, CATEGORIÆ, ET postprædicamenta.

11. Prima; ternario numero: secunda, decem diuersis primò generibus: postrema quinque communium terminorum acceptionibus & distinctionib; explicantur. Notiones tã antepredicamentorū quã categoriarū si quid cupiã hesitāti, scrupuli iniiciūt, oppugnētur.

ANTE

ANTEPRÆDICAMENTA IN SPECIE.

12. Vniuoca dicuntur, quorum nomen commune est, & ratio nominis est eadem. Contra, æquiuoca, nomen idē habent, sed rationem nominis diuersam. Denominatiua, ab vno ducta nomine, solo casu differunt. Voces, in eas quæ dicuntur incomplexæ, & in complexas: res, in substantiam vniuersalem, vel singularem; item in accidens singulare, & vniuersale, rectē diuiduntur.

PRÆDICAMENTA IN SPECIE; ET primò substantia.

13. Rectē formalis ratio substantiæ, explicatur per esse per se. Diuiditur in primam, & secundā, vel vt subiectum, in accidentia, vel vt accidens, in subiecta; vel vt accidens, in accidentia, prout sumpseris. De sex illius proprietatibus legitimis, nulla est controuersia.

QUANTITAS.

14. Quantum, est in ea, quæ insunt diuisibile, quorum vtrumq; aut singulū, vnum quid & hoc aliquid aptum est esse. Vt formæ subest, ei repugnat diuidi in infinitum. Species tam continuæ vt linea, superficies, corpus, quàm discretæ, benè assignantur; cum & vltima vnitas, sit forma numeri & mensura orationis. Esse mensurabile, diuisibile, extensuum partium ad locum, non est ratio Quantitatis, formalis.

RELATIO.

15. Est Ens prædicamentale, rationē sui constitutiua habens esse Ad. A parte rei à fundamēto distinguitur. Demptis relatiuis tertij generis, quæuis alia terminatur ad respectiua. Vnitatem numeralem à termino obtinet; diuersitatē specificam à fundamēto.

QUALITAS.

16. Est id, quo primò & per se, quales accidētaliter nominamur. Quatuor habet species, quarum habitus & dispositio realiter; duæ proximæ, secundū magis & minūs perfectum differunt, vltima rectē quantitatis terminus nuncupatur. Proprietates habet legitimas.

SEX VLTIMA PRÆDICAMENTA.

17. Nō sunt extrinsecæ denominationes; nec relationes extrinsecus aduenientes, sed Entitates quamuis exiguæ, & ab extrinseco pendentes, ipsæ tamē in se absolutæ. Hinc actio est realitas, qua potentia actiua in actu cōstituitur, similiter passio illud est quo passum

est in actu secūdo. Vbi forma est resultans in corpore, ex loci circumscriptione. Quando relinquitur ex tempore. Situs partium est in loco dispositio. Habitus id quod ex adiacentia resultat alterius.

LIBRI DE INTERPRÆTATIONE.

18. Tām nominis quàm verbi natura, benè à Philosopho explicantur : item & oratio, cum dicitur esse vox significatiua, ad placitum, cuius partes separatæ aliquid significant vt dicto, non vt affirmatio & negatio. Ab effectu in perfectam & imperfectam diuiditur. Diuisio eiusdem per vocem & significationem est essentialis ; per partes quib⁹ constat integralis, per partes subiectiuas, totius vniuersalis.

ENUNCIATIO.

19. Est oratio, in qua vnum enunciat^{ur} de altero : dicitur & oratio verum vel falsum significans indicando. Est vna vnius ordinati conceptus qualitas. Ad penetrandos eius terminos, notitia suppositionis, ampliationis, restrictionis, alienationis, appellationis supponenda est. Diuisiones eius, quotquot ex diuersis Philosophi locis assignantur, sustinendæ sunt.

20. Esto veritas in communi, sit rei cum suis principijs conformitas ; tamen formaliter sumpta, est intellectus componentis & diuidentis, cuius est perfectiua, adæquatio ; quo ad rem cognitam seu intellectam. Tam veritas quàm falsitas accidunt propositionibus ; exceptis proprietatibus, quæ mutuā illarum habitudinem consequuntur ; & sunt tres oppositio, æquipollentia, conuersio.

21. Fatalem omnium quæ aguntur necessitatem quis proteruè adstruat ; vel actionum libertatē auferat ; quando prima radix contingentiae sit diuinæ voluntatis efficacia, proxima, causarum secundarum defectibilitas. Propositiones de futuro contingenti ratione causæ imutabilis, sunt determinatæ veræ aut falsæ : at quæ pendent à causis mutabilibus ad vtrumlibet sunt indifferentes.

DEFINITIO, ET DIVISIO.

22. Isti sunt duo modi sciendi, ab argumentatione distincti. Definitio, quæ est oratio, naturā rei explicans, & Diuisio quæ est oratio, rem per sua membra ; & terminum seu nomen commune, per suas significationes dispertiens. Definitionis est, esse bonam vel malam, rei definitæ propriam, definito clariorem &c.

23. Diuisionis est, accipi per partes oppositas, totum diuisum exhaurire &c. Definitio aut est rei, aut nominis, & realis, vel est essentialis, idq; vel Physica, vel Metaphysica ; vel est descriptiua, vel causalis.

causalis. Diuisio, secundum variam acceptionem totius, quod est vniuersale, actuale, accidentale, virtuale, integrale, &c. variè diuiditur.

LIBRI ANALYTICI PRIORES, & posteriores.

24. Discursus, qui in communi est motus intellectus, ex cognitione vnius rei in aliam, pluribus constat notitijs; quem illationis bonitas, vt sua proprietas consequitur. Adæquatè, per consequentiam; & argumentationem diuiditur. Argumentatio, syllogismus, & inductionem continet. Diuisio syllogismi etsi varia sit, tamen in ea conditio, vel materiæ, vel formæ attenditur.

25. Ex conditione materiæ, syllogismus probabilis, medio verisimili opinionem accersit, sophisticus, fallaciæ fuco ad deceptionem vtitur. Apodictici finis est scientia.

26. Omnis doctrina, & omnis disciplina discursiua, fit ex præexistenti cognitione. Præcognitiones sunt An sit, & Quid sit, præcognita autem, subiectum, passio, principium.

27. Cum prioritate naturæ, præmissarum ad conclusionem, stat simultas temporis, per quam eodem instanti, ab intellectu bene disposito cognoscuntur.

NATURA, DEMONSTRATIONIS.

28. Gemina definitione explicatur. Prima est, quod sit syllogismus scire faciens. Secunda; quod constet ex veris, primis, immediatis, prioribus, notioribus, causisq; conclusionis. Diuisio eius adæquata, est in propter quid, & quia est. Cum medium demonstrationis sit definitio subiecti; quid prohibet, scientiarum subiecta posse demonstrari. Diuiditur item in subalternatam, & subalternatam, tanquam veram scientiam.

EFFECTVS DEMONSTRATIONIS.


29. Est ipsa scientia, quæ est rei per causam, propter quam res est cognitio, & quia hoc non contingit aliter se habere. Ex causa effectiua, esse dicitur habitus, demonstratione acquisitus.

HABITVS PRICIPIORVM.

30. A potentia intellectiua distinguuntur. A natura inesse dicuntur, concurrente notitia extrinseca, qua excitantur. Probabilia à certis, & practica à speculatiuis, specie distinguuntur. Similiter opinio, fides, scientia, solertia; ita vt simul in eodem intellectu, eodem tempore, de eodem subiecto, non possint consistere.

SPECIFICATIO SCIENTIARVM.

31. Aurea, non tantum quia ardua, sed quia veritati consentanea doctrina est, vnitatem at hominem scientiarum, sumendam esse, in esse scibilis, ex diuersa ratione obiecti, non Quæ dicta, sed sub Qua: cuius diuersus abstractionis gradus, à Philosopho 6. Met: cap. imò declaratus, fundamentum est solidissimum. Hinc quæuis scientia, est vnus simplex habitus, idq; nihil obstante, Entitatum rationis Quæ; diuersitate.



TRIASMI MONAS ALTERA.

SCIENTIA NATVRALIS, METHODVS PRO-
cedendi, principia in communi.

32. De rebus naturæ, sub modo immaterialitatis debito sumptis, datur scientia Entis mobilis, eiusq; principiorum, causarum, partium seu specierum, proprietatum contemplatrix; in naturalem, Mathematicas, Metaphysicam, distributa.

33. Adæquatum illius obiectum, est Ens mobile, vt mobilitas, radicem dicit motus, in omni rerum natura reperibilem, prout per rationem abstractionis, à materia singulari, constituitur.

34. Bonus doctrinæ ordo, & processus in cognoscendo seruator, cum ab vniuersalioribus, & naturâ notioribus, ad minùs vniuersalia, & nobis notiora, proceditur.

35. Principia in communi sunt, quæ neq; sunt ex alijs, neq; ex alterutris, omnia verò fiunt ex ipsis. In fieri sunt contraria, in facto esse non. in quo sensu, priuatio & forma, dicuntur prima contraria.

PRINCIPIA IN SPECIE.

36. Tria sunt, Materia, Forma Priuatio. Duo positiuè rem naturalem perficiunt, tertium ad introductionem contrarij, à subiecto remouetur.

37. Materia prima dicitur, cum absq; omni forma concipitur; vt est sub forma secunda est. Prima est Ens purè potentiale; productum in tempore, seu veriùs comproductum rebus ab illo principio; cui soli semper fuit, & est liberum, aliquid ex nihilo producere. Incapax existentiae per omnem potentiam. Est ingenerabilis & incorruptibilis, esto sit radix corruptionis. Formæ naturaliter passiuè flagitiua. Vnitas ei debetur numerica, negatiua. Est illi quantitas interminata coæua radicaliter.

FORMA, PRINCIPIVM NOBILISSIMVM.

38. Est actus primus, dans rei cuius est, esse per se. Compositio virtualis, eius simplicitati non præiudicat. Naturales formas, nō præexistere in materia, neq; latitare, neq; à participatione Idæarū, vel intelligentia datrice formarum deriuari, certum est: sed benè verum, ipsas educi de potentia materiæ, idque cum sunt substantiales; nam accidentales, à proprio subiecto dicunt dependentiam, sed supernaturalis, de potentia obedientiali, proprij subiecti educuntur. Substantialis forma, immaterialis creatur.

PRIVATIO.

39. In fieri est principium per se, dicens carentiam formæ in subiecto; quæ cum acquiritur; à priuatione, vt à termino à Quo, fit recessus, qui sola ratione ibi esse concipitur. Tot formæ illi opponi intelliguntur; quot natæ sunt successiuè recipi in materia.

COMPOSITVM NATVRALE.

40. Constat ex partibus essentialibus per se; sic, quod totum compositum, non est tertia Entitas, suis partibus simul sumptis & vnitis superaddita. Ac vnio saltem est relatio; quæ extrema actu vnita consequitur; à quibus totum, saltem ratione ratiocinata distinguitur.

NATVRA & ARS.

41. Recentiorum crudiora cerebella, tam excocto vt erat Aristotelicum, de naturæ definitione, frustra audent obstrepere. Essentialem tuemur; quando natura dicitur esse principium & causa, motus & quietis, eius in quo est, per se, primò, & non per accidens. Arti, vt in effectus naturæ, aliquid juris concedamus; tam practicos esse nos diffitemur. Similirudinariæ aliquid facultatis obtineat, eaq; sit contenta.

CAVSARVM GENERA.

42. Quatuor sunt, Materialis, Formalis, Efficiens, Finalis. Idæa potissimum ad genus causæ formalis reuocanda. Prioritatem à Quo, causa quælibet, respectu sui effectus obtinet; & hic ab illa dicit dependentiam. Effectus singulis in suo genere certum est respondere. Substantiarum creaturarum nulla est; quæ seipsa & immediate possit operari: quamuis sit radicale principium operandi. Sufficit quoad hoc, relictam esse in accidentibus virtutem substantiæ, quoad operationem proximam; ad effectum producendum, idque sine partiali & nouo influxu substantiæ.

D

Materialis

CAVSÆ IN SPECIE.

43. Materialis est id ex quo fit aliquid, cum per se inest. Causalitas eius, est facta ab agente passiuæ immutatio. Formalis causa, dat esse rei specificum. Efficiens est vnde primò incipit motus. Causalitas eius est actio; seu agere & operari in concreto, in actu secundo. Diuisio effectricis causæ patet multipliciter. Alia est per se, alia per accidens; ea quæ est per se, in principalem, & instrumentalem diuiditur. Iam principalis, aut est prima, aut secunda, aut vniuersalis, aut particularis, aut æqui-uoca, aut vni-uoca, aut totalis, aut partialis, aut libera, aut necessaria; aut Physica, aut Moralis, &c. Finalis causæ est, mouere appetitū secundum realem bonitatem; & in tali actu consistit eius causalitas.

44. Præter virtutem, à principali agente communicari solitam instrumento, requiritur in illo virtus propria; quæ ad operandum instrumentaliter eleuatur. Virtus à principali, in actionem instrumenti deriuata, est præuia motio. Eadem, realiter, omnem causam secundam, ad operandum in actu secundo, applicando determinat.

EFFECTVS CAVSÆ.

45. Quis cuius respondet in suo genere; ita vt eundem numericè, à pluribus causis poni repugnet absolutè; non idem est de causis partialibus, aut quæ sunt diuersi ordinis.

MOTVS, PRINCEPS PASSIO ENTIS MOBILIS; eiusq; definitio.

46. Est actus Entis in potentia, prout in potentia. Continentur sub illa mutationes instantaneæ. Dicitur & actus mobilis, connotatiue ad ea, quæ generantur, corrumpuntur, alterantur, augentur vt Quod. Realiter cum actione & passione identificatur; formaliter distinguuntur. Similiter & à termino ad Quem, à quo specificatur. Actio transiens est in passo. Motus datur ad substantiam, Quantitatem; Qualitatem, ad relationē non datur motus per se. Vnitas mobilis, termini, & temporis, ad numericam unitatem; termini; & medij, ad contrarietatem motuum successiuam, requiruntur.

ALTERA PASSIO; INFINITVM.

47. Est id, cuius partem quantamcunque acceperimus, semper alia & alia restat accipienda. Actuale & Categorematicum, nullum datur in rerum natura: potentiâ, in Quantitate, & Qualitate, adeoq; in substantiâ, concedi possit.

INDI-

INDIVISIBILE.

48. Dantur indivisibilia, tam continuatiua, quàm terminatiua. partium continui, quæ sunt Entia positiua, & realia in illo. Non tamen continuum, ex solis indivisibilibus componitur. Quando ex parte indivisibilis, nulla se tenet motus continuitas; ipsum vt tale, non dicitur moueri per se; & si esset in spacio indivisibili mobile per se; non esset tamen in parte temporis. Continuo, non vt subest termino naturali, non repugnant partes proportionales infinitæ; idq; nec secundum diuisionem actuale; designatæ repugnant.

NATURÆ LOCI EXPLICATIO.

49. Quo ad materiale, est superficies concaua continentis, quo ad formale, rectè dicitur esse immobilis, prout à primo distat locante. Hinc neque erit quid substantiale, lucidum, immateriale; neque totum spatium, seu intervallum, quod intra superficiem ambientis continetur. Superficies superioris ambientis, locus est circumscriptius, eius corporis quod continetur. Vltima sphaera secundum partes est in loco, idque in potentia. Locatum conseruare legitima est loci proprietas vnum locatum, simul in pluribus locis esse nequit, esto plura eodem loco circumscribantur.

VACVI IMAGINARIA CONCEPTIO.

50. Si quis concipit locum, nullo penitus repletum corpore, vacuum est conceptum. Nulla virtute limitata; in rerum natura datum reperitur. Si daretur, motus in illo esset, mobilis alicuius in tempore.

NATURA TEMPORIS.

51. Est Ens extra animam. Quia est numerus motus secundum prius & posterius. Existit tantillum, quantum datur Entitatis inter partem immediatè præteritam, & subsequenter instans, quo ambæ vniuntur. Fundamentaliter est in motu primi mobilis, formaliter completur per rationem partes colligentem. Cum sit numerus prioris & posterioris in motu, ab ipso ex natura rei distinguitur.

ÆTERNITAS, ET ÆVVM.

52. Quis primam vel leuiter apprehendet, quantumuis diu cogitet? Adumbratur, cum dicitur; Tota simul, & perfecta, vitæ interminabilis possessio. Entis absolutè immutabilis, est tam secundum esse, quàm secundum accidentia, duratio. Et hîc quoq; caligat intellectus. Æuum est duratio rei, secundum substantiam immutabilis, mutabilis secundum accidentia.

INCEPTIO RERVM, ET DESITIO.

53. Substantiæ incorruptibiles, & corruptibiles, incipiunt per primum sui esse; sed desinunt istæ, per vltimum non esse. Entia successiua, incipiunt per vltimum non esse, desinunt per primum non esse. Ne termini scrupulum pariant, sic accipiuntur. Instans inceptionis intrinsecum & affirmatiuum, est primum sui esse: instans desitionis ei respondens, est vltimū esse: instans inceptionis extrinsecum, est vltimum non esse; instans desitionis ei respondens, est primum non esse. Vt modos inceptions & desitionis, ita quoq; terminos magnitudinis, & paruitatis, Entibus in rerum natura constitutis, deberi certum est.

MOTVS GRAVIVM & LEVIVM.

54. A generante illa moueri certum est. Proiecta virtute projicientis impelluntur. Quod mouet, approximatum sit oportet; aut contactu, suppositi, aut saltem virtuali. In distans, non potest agere.

PRIMVS MOTOR VT LVMINE NATV- rali cognitus.

55. Hic seipso maior Aristoteles, cum docuit, Omne quod mouetur ab alio moueri. atque subiunxit quod; In motibus eiusmodi datur essentialis subordinatio ita vt non sit processus per infinitum; quid restabat inferendum naturaliter, quam quod intulit, dari primū mouens, vnum, immobile, independens ab alio, infinitæ perfectionis, & essentiæ; idem esse actum purissimum, simplicissimum; esse ubiq; se & omnia intelligere, velle seipsum, & alia omnia in se cognoscere: Ens esse æternum, æternæ felicitatis, & amoris.

EX LIBRIS DE CÆLO.

56. Cælorum natura est simplex, quamuis orbes singuli constant ex materia & forma. Substantia illorum non est elementaris, sed multò præstantior. Forma sua cælo vnitur vt motor mobili, & per contactum mouet virtualem, cū dependentia à primo motore immobili. Porro cum materia sit propter formam, & forma cæli diuersa sit à formis sublunariū, materia eiusdē diuersa est orbiū singulorū.

QUALITATES CÆLORVM.

57. Cælum est ingenerabile, incorruptibile, immune à qualitatibus alterantibus non graue, non leue, non calidum, frigidum, nisi eminenter. Quod positionum differentias numero sex obtineat sursum, deorsū, dextrū, sinistrū, ante, retrò, nec tamen sursum vel deorsum feratur; mirare & oppugna si placet.

MOTVS CÆLORVM.

58. Est vniformis, æquabilis, circularis, & planè naturalis. licet sit à principio extrinseco.

NVMERVS ORBIVM.

59. Octonario, à Philosopho comprehensus, Neoterici nec fortasse immeritò, ad duodenarium processerunt. Infima specie inter se distinguuntur. Quanto spacio singuli reuolutionem suam conficiant, assentimur Mathematicis.

ACTIO CÆLORVM.

60. Efficissima est; illà enim cum suo motu cessante, cessarent actiones inferiorum; quæ ab illis dicunt dependentiam. Tanta efficacia, in voluntates humanas, nunquàm directè agit; primo libertatis nostræ vetante principio. Agunt tamen in hæc inferiora, non tantum motu, sed & luce, & occultis qualitatibus.

SYDERA STELLÆ, PLANETÆ.

61. Astron Græcis, Latinis dicitur sydus, signum est compluriū stellarum figura coactum: vt arietis, leonis, Persei &c. Stella vnum quid est numero; Aristoteli pars sui orbis densior. Quo natura earū quàm orbis præstantior arguitur. Aliæ fixæ sunt, quæ eandem defixæ firmamento, seruant inter se distantiam. aliæ erraticæ, quæ quaquaversus motibus euagantur liberrimis. Sunt septem, Luna, Mercurius, Venus, Sol, Mars, Iupiter, Saturnus.

62. Solis & Lunæ maculas, ingeniosi scholæ Mathematicæ professores promoueant. Philosophi simpliciores, obtutus hebetioris, nullas in sole possunt intueri. Credunt interim hoc strenuè affirmantibus; priusquàm ætas consequens; nouas opiniones ausit identidem adstruere. Illud certiùs, stellas, gradus certos magnitudinis obtinere, quæ Astronomi vbertim explicant.

EX LIBRIS METEORORVM.

63. Mixtorum inanimatorum, alia sunt corpora perfectà, quæ transmutatis elementis, formas substantiales habent: alia imperfecta, quæ magna ex parte, formas elementorum retinent. Vocantur ea, quæ in sublimi generantur; & prout sunt eleuata considerantur. Principia eorum, vapores, & exhalationes: quæ ab elementis specie non distinguuntur. Subiectum ipsorum, est corpus simplex ad mixturem diuersorum imperfectam mobile.

64. Vapor, est halitus seu exspiratio subtilis, calida & humida,
E quæ

quæ solis radijs, sursum ex aqua prouocatur. Qui si in aquis includitur, thermas, & mineralia generat. Exhalatio, est halitus terræ calidus & siccus, ex terra, vi solis & astrorum, in sublime eleuatus; cuius adustio, generationi siccorum Meteororum accomodatur. Hinc venti, tonitrua, fulmina, Cometæ. Aqua; & terra, remota sunt ex parte materiæ, meteororum principia.

65. Formale principium & causa meteori, est forma vaporis & exhalationis, sibi debita forma peculiari terminata, vt quod Cometes sit crinitus, halo rotundus, iris arcuata; ros ad instar gemmarum conformatus.

66. Causa efficiens, vel est supernaturalis; diuinum beneplacitum, hoc vel illo tempore, talia meteora prodire iubens; vel naturalis, eaq; vel principalis, vt est solis virtus & influxus; vel instrumentalis, vt est qualitas proxima, quæ ad productionem impressionis immediatè agit; vt calor ad calidum meteoron, frigus ad frigidum producendum.

67. Causa finalis, DEI voluntas aliquid prænuncians. Qualis erat circulus, Augusto, à sybilla, cū virgine paruulum gestante, monstratus. Quo fine accensi ardent non rarò Cometæ, motus terræ, flammæ montium formidolosæ, imperia in pænam scelerum deuorantes, permittuntur. Naturalis istorum finis vniuersi perfectio; elementorū repurgatio; dependentiæ inferiorū à superiorib' manifestatio.

LOCVS GENERATIONIS METEORORVM.

68. Terra, eorum quæ in eius visceribus includuntur. Aer tamen cum sua triplici regione, est illis multò accomodatior.

69. In summa regione, vera ignea visuntur. Cometæ, Pyramides, Lampades, scintillæ volantes, A sub ascendentes, & quorū materia est calida & sicca exhalatio: quæ si non vehementer sursum feratur, ob non excellentes Qualitates, est causa A sub descendens, Draconis volantis, stellæ cadentis, A sub descendens, &c. quæ in media consistunt regione. Aquea sunt, quorum materia vapor variè dispositus: Grando, nix, pluuia, ros, pruina, mel, manna, &c.

70. Terrea dicuntur venti quorum materia est vapor exhalatus, siccus & terreus, qui cum sit leuitatis exiguæ; delatus ad secundam regionem aëris, ibiq; addensato, inferius propellitur. Quos tandem in obliquum ferri & aërem commouere oportet. Quatuor sunt principes, Subsolanus, Auster, Septentrio, Zephyrus. Eorum collaterales non pauci. Turbo, Ecnephias; Typhon, Præster sunt violenti. Qui venti prouinciales nominentur, Plin: vide lib: 2. cap: 40.

71. Gaudet natura, non omnia perspecta esse indagatori suū; fatetur

tetur iste, ignorari causam motus maris legitimam. Cæli influxum, ne nihil nosse videatur prætendit. Altitudo partis septentrionalis, ratione australis, probabiliter cū Philosopho sustinetur. Quod si ad Lunā recurras; vt diuersimodè à Sole illustratur; quare illa in Horizonte existente, æstus non desinunt?

72. Salsedo maris, indecoctarum exhalationum multitudini tribuitur. At fluminum aqua, per arenosa terræ loca distillata, dulcior efficitur.

EX LIBRIS DE GENERATIONE, & corruptione.

73. Generatio est mutatio, facta in subiecto, de non esse ad esse; vera est mutatio, distincta realiter ab alteratione. Generatio viuentium, est processio à principio viuente coniuncto, in similitudinem naturæ. Subiectum cui inhæret generatio est totum compositum. Terminus generationis vt quo, est forma partis, totalis & adæquatus, est ipsum compositum.

CORRUPTIO.

74. Est de esse ad non esse mutatio. A generatione essentialiter distinguitur; esto in ratione actionis identificantur. Corruptio ab agente per se non intenditur, præsertim particulari. Datur in corruptione rei naturalis resolutio, vsq; ad materiam primam. Neq; sunt eadem numero accidentia, in genito, quæ fuerant in corrupto.

ALTERATIO.

75. Est mutatio subiecto manente sensibili, in eius passionibus, aut contrarijs entibus, aut medijs. Diuiditur in intensiorem & remissionem. Est ad tertiam speciem Qualitatis. In ratione motus est verè motus continuus. Intensio Qualitatis fit per maiorem radicaliorem in subiecto, & participationem in ipso.

AVGMENTATIO.

76. Est motus à minori quantitate ad maiorem. Ab accretione distinguitur formaliter. Solis competit viuentibus. Iuxta eam manet viuens idem numero, toto incrementi ac vitæ suæ tempore. Partes aliquotas viuentis augeri sufficit, neq; omnes æqualiter.

AGENS & PASSVM.

77. Simile, non agit in alterū simile. Si agens passio quo ad speciem est simile, cæterum quo ad gradū & conditiones agendi est dissimile, sequitur actio. Agens, in materia cum passio conueniens, à qualitate eius contraria repatitur, tam secundum eandem qualitatem, quam secundum easdem partes.

MISTIO.

78. Rectè mistio dicitur esse, miscibilium alteratorū unio. Vera est & in liquoribus, quando sunt contrariarū qualitātū & specierum.

ELEMENTA; & MISTVM.

79. Elementum est corpus, in quod cætera diuiduntur, in quib⁹ actu inest, aut potentia, ipsum autem est indiuisibile secundum speciem. Quatuor sunt, ignis, aer, aqua, terra. Ad constitutionem misti, secundum qualitates refractas concurrunt; quod est elemeta manere in misto virtualiter. Datur temperamentum, in qualitatibus mistis, tam motiuis quàm alteratiuis, quo ad iustitiam. Dantur elementa syncera secundum partes, dantur & formæ illorum substantiales. Est probabile ignem esse in summo calidum & siccum, terrā in summo frigidam, aquam in summo humidam, aerem in remisso calidum & humidum. Qualitates contrariæ, saltem in gradibus remissis, possunt in eodem subiecto consistere. Elementum immediate ex alio potest generari. Symbola facilius in seipsa transmutantur, quàm assymbola. Duo assymbola, generant tertium, quando corrumpuntur; symbola non generant.

EX LIBRIS DE ANIMA.

NATURA ANIMÆ.

80. Anima est actus primus, corporis Physici organici, potentiā vitam habentis. & ; Anima est principium, quo viuimus, sentimus, mouemur, intelligimus. In communi sumpta adæquatè diuiditur in vegetatiuam, sensitiuam, & intellectiuam.

81. Intellectiua præcedentes continet, formaliter eminenter. Ideo vna eademq; confert esse vegetatiuum, sensitiuū, locomotiuū, & intellectiuum. Animæ perfectorum animalium sunt inextensæ, & indiuisibiles; esto imperfectorum, & plantarum, possint diuidi. Licet anima intellectiua sit radix diuisibilitatis ipsa tamen est tota in toto, & tota in quauis parte corporis.

POTENTIARVM ANIMÆ GENERA.

82. Quinque sunt, vegetatiuum, sensitiuum, appetitiuum, locomotiuum, intellectiuum. Realiter ab essentia animæ distinguuntur. Ab anima dimanant per sequelam naturalem. Vnitatem & distinctionem ex obiectis accipiunt.

ANIMA VEGETATIVA

83. Est principium generandi tale, quale ipsa est. Adæquatè diuiditur

uiditur in nutritiuam, augmentatiuam, generatiuam. Nutritiua à calore, & primis qualitatibus realiter distinguitur; & potentia generatiua à nutritiua, & augmentatiua.

ANIMA SENTITIVA.

84. Potentiæ eius, pariter ex operationibus, & obiectis specificantur, & sunt externæ quinque, visiva, auditiva, odoratiua, gustatiua, tactiua. Potentia cognoscitiua, est species obiecti purè receptiua.

OBIECTVM SENSIBILE.

85. Rectè diuiditur obiectū sensibile, in per se, & per accidens, & quod est per se, in proprium, & commune. Sensus, circa proprium sensibile, per se non decipitur. Motus, quies, magnitudo, figura, numerus, sunt sensibilia quinque communia. Sensus externus, ab excellenti sensibili non tantum reali, sed etiam intentionali, corrumpitur. Error sensus externi, non est veritas, aut falsitas, nec actio eius reflexa.

REQUISITA VIDE NDI.

86. Lux quæ est qualitas naturalis à colore distincta realiter. Est actus diaphani seu perspicui, vt tale est. Color est extremitas perspicui, in corpore terminato. Pupilla suis vestita membranis, cum neruo optico, est organum visus. Visio, fit per reptionem specierū obiecti in potentia. Est actus vitalis, & potentiæ operatio. Medium visus non debet esse immediatum, sed proportionaliter dispositum.

REQUISITA AUDITVS.

87. Medium confractum, est soni obiectum. Defertur sonus ad potentiam, & intentionaliter, & realiter. Percussio aeris respirati, facta ab anima, vox est. At sonus, est ex forti duorum corporū collisione, nata qualitas. Echo sonus est intentionalis, ex voce refracta causatus. Organum soni aer in auricularum neruosis inclusus anfractibus.

ODOR CVM SVIS REQUISITIS.

88. Odor est qualitas, nata ex siccitatis suprà humidum prædominio. Eius medium, & aer, & aqua. Organa, processus quidam caruncularum, dicti mamillares, cerebrum versus protensi, apti constringi & dilatari. Actus eius ipsa odorandi actio, à præsentī obiecto excitata.

REQUISITA SAPORIS.

89. Sapor, est passio à sicco terrestri in humido, causata ex primarum temperie qualitatibus. Hoc obiectum gustus est, organum, & medium linguæ caro, & nervus à cerebro in linguam protensus.

TACTVS.

90. Obiectum eius, qualitates tam primæ quàm secundæ; temperamentum eius excedentes. Organum eius nervus est, à spina dorsi ortum ducens, toto corpore diffusus, & medio interno cooperatus, vnus est quo ad speciem at hominem.

POTENTIÆ SENSVM INTERNVM.

91. Quatuor sunt. sensus communis, imaginatiua, æstimatiua, memoria. Sunt à corde vt à principio, esto in diuersis cerebri partibus disponuntur. Sensus communis obiecto, exteriorum sensuum obiecta, eminenter continentur.

92. Phantasia, sensus est, obiectorum absentium species percipiens. Æstimatiua, species non sensatas, ex sensatis colligit. Memoratiua, specierum tam imaginatiuæ, quàm æstimatiuæ, est conseruatiua.

ANIMA RATIONALIS.

93. Est incorruptibilis, per se subsistens, spiritualis, & vera forma corporis. Potentiæ animæ ipsi realiter inhærentes, sunt intellectus, voluntas, ac memoria. Reliquarum subiectum est coniunctum ex anima & corpore. Intellectus diuiditur in possibilem & agentem.

94. Intellectus possibilis, obiectum proportionatum, pro hoc statu est quidditas sensibilis; quod & motuum dicitur; adæquatum verò quod & terminatum, Ens in sua sumptum latitudine. Singulare directè ab intellectu non est cognoscibile. Voluntas nulla re cogi potest. Memoria specierum intellectus est conseruatiua, nec ab intellectu distincta possibili.

INTELLECTIO.

95. Est vera operatio, non tamen transiens, sed immanens actio. Eius elicitiva, est intellectiua potentia, speciebus intelligibilibus informata. Terminatur verbo mentis, à se realiter distincto. Dictio, non est realiter distincta operatio, ab intellectione.

APPETITVS RATIONALIS.

96. Præter appetitum naturalem, & animale, qui in irascibilem, & concupiscibilem subdiuiditur, estq; causa motus localis animalium; datur potentia appetitiua animæ rationalis, habens libertatem,

bertatem, non tantum supra suos actus, aut motus inferiorum potentiarum, sed etiam supra actus intellectus, quamuis ille sit simpliciter perfectior potentia. Obiectum voluntatis, est bonum vniuersale, illam quo ad specificationem necessitans, at respectu boni particularis, semper manet libera, tam quo ad specificationem, quam quo ad exercitium.

TRIASMI MONAS TERTIA.

METAPHYSICÆ DICTA CONTINENS.

GENVS METAPHYSICÆ, & OBIECTVM.

97. In habitum Metaphysicæ, cadit ratio & sapientiæ, & scientiæ. Obiectum eius Ens reale & per se, commune creato & increato, vt stat sub abstractione, ab omni materia.

98. Habitus metaphysicæ, secundum speciemathomam est vnus. Ad illum pertinet, rerum omnium quidditates considerare in communi, non autem quo ad prædicata scientiarum inferiorum propria.

DIVISIO ENTIS.

99. Communissima, in Ens per se, & per Accidens, Entis per se, in reale, & rationis. Omnia prædicta membra, per vnum, & multa, possunt diuidi.

100. Ens reale, subdiuiditur in substantiam, & accidens, in causam, & causatum, in actum, & potentiam. Diuisiones, in ens reale, & rationis, cum sequentibus, sunt analogicæ.

ENTIS CONCEPTVS.

101. Ad DEVM & creaturas, ad substantiam & accidens, non est perfectè ac simpliciter vnus. Ideo vniuocatio Entis, ad prædicta diuisionis membra, locum non habet.

ENTIS ESSENTIA, & EXISTENTIA.

102. Realiter in DEO identificantur, virtualiter distinguuntur, in creatis vt duæ realitates, & etiam in accidentibus distinguuntur.

SUPPOSITVM, & SVBSISTENTIA.

103. Suppositum, supra naturam, addit terminum substantialem, ut complementum illi debitum: quod additum vocatur subsistentia, per quam singularis natura, redditur ulteriori termino in communicabilis. hypostasim Græci dixere.

ENTIS PASSIONES.

104. Ab Ente, ratione saltem distinguuntur, & sunt quinque, vnum, verum, bonum, res, aliquid.

105. Vnū est indiuisum in se, & diuisum à quouis alio. Radix indiuiduationis substantiarum materialium, est materia signata quantitate. Accidentia indiuiduantur per substantiam.

106. Verum primò dicit ens, secundò habitudinem. Eius ratio consistit in conformitate, inter intellectum & rem cognitam. Bonū supra Ens, addit rationem perfectiui.

INTELLIGENTIÆ.

107. Sunt substantiæ immateriales, per se subsistentes, & Entia de prædicamento substantiæ. Sunt compositæ ex genere & differentia, ex actu & potentia, ex essentia & existentia. Singulæ differunt specie. Seipsis indiuiduantur.

SVPREMVVS MOTOR, & FINIS OMNIVM.

108. Est summa, increata, & incomprehensa substantia, intellectualis, in se, & à se, suimet & omnium in se, modo vnico sibi peculiari contemplatrix. Omnia mouens, omnia intelligens, centrum omnis bonitatis per essentiam: vnicus, Maximus & Optimus totius vniuersi Princeps, & Monarcha: cui sit laus, honor, gloria sempiterna, in omni infinitorum sæculorum æternitate.



Sub fælicibus auspicijs Perillustreis & Admodum Reuerendi Dñi.

D. IACOBI NAYMANOWIC, I. V. D.


Canon: Cracou: Archidiaconi Pilecen. &c.

Vniuersitatis Cracouiens: Generalis

RECTORIS.



2. xxii. 31.



stantia-
susten-
n com-

inque,

dix in-
quan-

ratio
Bonū

Entia
fferen
ferunt

M. A

ntelle:
pecu-
ntrum
totiu:
sempi-

coi
coi
coi

H

Dñi.

coi
coi

coi
coi ni

11. 31.